

欽定古今圖書集成

方輿彙編職方典



欽定古今圖書集成方輿彙編職方典

第六百九十九卷目錄

松江府部彙考十一

松江府驛遞考

松江府兵制考

松江府物產考一

職方典第六百九十九卷

松江府部彙考十一

松江府驛遞考

府志

本府

華亭縣婁縣附郭

雲間遞運所 在府城谷陽門外澤潤橋之西

古名雲間館又曰雲間驛前志有西湖官驛又

曰館驛在府東偏蓋別署也元遷驛於府治後

改爲松江站以舊驛爲在城稅司明洪武初復

建於此仍舊名雲間驛三十年改爲遞運所祇

待委積仍如驛例舊風涇上海各有驛至是俱
省雲間驛樓久廢正德二年撤遞運所門為樓
設大使一員祇謁往來而河下水嘗淺涸不便
駐舟故於慶雲橋之西復設館驛以待巡使者
駐節俗因謂之外館驛而謂遞運所曰內館驛
風涇驛 在風涇鎮江浙往來之衝宋設今廢
西湖官驛 臨西湖上故陸氏放鶴灘也有水
閣頗稱幽致今廢
裏館驛 卽鶴城書院在普照寺西故縣之別

署後以為驛館明初革雲間驛通判洪景德重
為繕理易今名凡齋奉詔勅使臣居此

聽鶴亭 在今西林寺西舊名谷陽俗呼接官
亭古送迎憩息之所元元貞三年修易今名至
正中府監哈只哈散沙繼修益壯左有堂扁曰
集英門榜曰駐驛

水雲亭 在秀野橋北凡輜軒使乘大舟而來
內地潮水枯涸卽止於此今稱為接官亭
問俗亭 在雲間第一橋南華亭昔隸秀州此

地及風涇驛為往來要衝今惟江浙巡漕御史往來飲餞駐泊於此

上海驛 今為公館府官行縣則蒞焉

上海觀瀾亭 俗名接官亭在坊浜北

府前總鋪 在府東前志稱郡治東偏有近民

亭宋華亭知縣楊瑾建元時為館驛即其地也

東路至上海縣又東至中後所十一鋪

車墩鋪 胡婆鋪 紫岡鋪

八尺鋪 華涇鋪 烏涇鋪

龍華鋪 上海縣前鋪

周八鋪 楊灰鋪

南匯觜千戶所前鋪

西路至嘉善縣界六鋪

吉陽鋪 斜塘鋪 滕港鋪

西唐灣鋪 陳涇鋪 風涇鋪

南路至金山衛東南至中前所六鋪

蓮花朵鋪 楊胥鋪 金山衛前鋪

漕涇鋪 袁浦鋪 青村鋪

北路至青浦縣七鋪

通波鋪 興福鋪 黃蠻涇鋪

北簞山鋪 郊店鋪 青龍鋪

艾祈鋪

西北由青浦縣至崑山縣界五鋪

白鶴鋪 浦闕鋪 徐公鋪

江橋鋪 綠葭浜鋪 以上凡三十六鋪每

鋪九里

按嘉禾志元制松江府急遞鋪一十有四自風

涇東接泥滑橋為十二里泥滑橋東接洙涇洙

涇東接九里庵九里庵東接李塔匯李塔匯東

接吉陽匯皆為九里吉陽東接府前為十五里

府前東接張涇為十八里張涇東接盤龍為十

五里盤龍東接新墳新墳東接錢墳皆十七里

錢墳東接龍華十八里龍華東接淡井淡井東

接上海皆九里

上海縣志 按青浦縣志不載

總鋪 在縣治東設司兵六名

中後所鋪 在浦東以次相遞

川沙鋪 自總鋪東遞至此五十里設司兵二名

舊設廠絳夫五十名歲編工食銀三百六十兩

康熙八年裁革

舊設官馬十六匹歲編工食銀二百三十兩四

錢康熙十年減改官馬三匹設給工食銀一百

八兩馬夫二名工食銀二十八兩八錢康熙十

四年裁改

康熙二十年復設官馬二匹歲編草料銀五十

七兩六錢馬夫一名歲編工食銀一十兩八錢

三年均編每匹馬價銀五兩共銀十兩又編給

每歲鞍轡等銀三兩

又復設水旱夫四名卽廠絳夫每名歲編工食

銀一十四兩共五十七兩六錢以供本縣公務

役使

松江府兵制考

府志

本府

江南全省提督總兵官一員駐劄本府

提標中營遊擊一員 守備一員

千總二員 把總四員

提標左營遊擊一員 守備一員

千總二員 把總四員

提標右營遊擊一員 守備一員

千總二員 把總四員

提標前營遊擊一員 守備一員

千總二員 把總四員

提標後營遊擊一員 守備一員

千總二員 把總四員

提標城守營遊擊一員 守備一員

千總二員 把總四員

提標經制額設中營官兵一千名有馬戰兵三百名無馬戰兵二百名步守兵五百名坐馬二百匹戰馬三百匹

提標經制額設左營官兵一千名有馬戰兵三百名無馬戰兵二百名步守兵五百名坐馬二百匹戰馬三百匹

提標經制額設右營官兵一千名有馬戰兵三百名無馬戰兵二百名步守兵五百名坐馬二百匹戰馬三百匹

提標經制額設前營官兵一千名有馬戰兵三百名無馬戰兵二百名步守兵五百名坐馬二百匹戰馬三百匹

提標經制額設後營官兵一千名有馬戰兵三百名無馬戰兵二百名步守兵五百名坐馬二十二匹戰馬三百匹

提標經制額設城守營官兵一千名有馬戰兵三百名無馬戰兵二百名步守兵五百名坐馬二十二匹戰馬三百匹

遠戍兵防原額軍戶四千六百三十一名
軍兵總額糧餉之數

府凡一衛五所額設正軍五千二百餘名額派

三縣軍儲糧四萬三千八百三十餘石或增加焉其水陸民兵散布三縣及緣海歲額共四千二百餘名船隻駕夫馬匹草料在外

華亭縣額設陸兵三百名水兵二百名

上海縣額設陸兵四百名水兵八十名哨船八隻

青浦縣額設哨守兵三百名內陸兵二百三十名水兵七十名哨船六隻後增設九隻內守五城門各一朱家角及廣富林白鶴江三鎮各一

跟隨本縣迎送上司一

提督各標營官兵歲支俸餉銀十萬七千六百

八十兩三錢一分三釐米二萬一千六百石

馬匹歲支料二萬四千五百九十五石三斗草

七萬六千七百五十二束

在外沿海黃浦金山等營官兵三千四百二十

四員各馬七百三十匹歲支俸餉銀六萬六千

二百九十四兩三錢八分二釐零米一萬二千

二百四十石

金山衛原額官軍舍餘二千二百餘名民兵三

千餘名後存陸營民兵六百八十七名水營民

兵四百四十五名軍選鋒五百六十名後存五

百二十七名戰馬三十六匹日給口糧俱本府

屬縣練兵銀內支給

本營官兵糧銀及叅將供應馬匹草料共銀八

千一百七兩零又沙船二十隻該糧銀三千一

十六兩零

提督標經制額設叅將一員

中軍守備一員 千總二員

把總四員

額設有馬戰兵二百名無馬戰兵三百名步守兵五百名各官坐馬二十四匹各兵戰馬三百匹

順治四年設守備一員掌衛印理七所屯田

府境巡徼司兵之署凡內郡要地各設巡檢司主譏往來姦慝及私販禁鹽逃亡軍民罪囚并無引私越之人及警邏之事後歷有更置蓋因

要阨之所有時變遷故司署亦隨異宜耳

華亭金山司 明洪武初建於張涇堰至十九

年徙建胡家港口在華亭東南六十里

南橋司 明洪武初原建於南橋鎮稱戚木司

十九年徙建於戚木涇萬曆九年復徙於南橋

改今名在華亭東南七十里

婁縣柳橋司 明洪武三年建於柳橋之東數

里洙涇鎮在婁縣西南三十六里

小貞司 明洪武七年建於小蒸鎮今鎮地分

屬青浦而官屬婁縣在縣西三十六里

上海黃浦司 明洪武六年建於黃浦之上閔

行鎮在上海南二十一保

三林莊司 明洪武六年建於三林塘鎮在上

海東南十七保

吳淞江司 明洪武五年建於吳淞江北岸在

上海西北二十七保

青浦新涇司 明洪武六年建於二十九保新

涇今在青浦四十五保青龍鎮

澱山司 明洪武初年建府西北六十里今在

青浦四十二保安莊鎮

南踰司 陶宅司 今俱廢革

每司設巡檢一員弓兵三十名沿海沿江者加

額或至七十名松境惟澱山司弓兵四十名新

涇等皆三十名各分汛地每司以數鎮屬其官

領之昔之經略地方者視村鎮要害而設專為

巡緝盜賊護衛村氓邇來廢弛其司官或因公

靡敝毀從便僦住或因註選踵躡任若傳舍其

司兵或散處村落宿蠹冒濫名實混淆

華亭縣汛地 南至金山衛東南至柘林青村

俱濱海東北至泗涇七保上海界東至十八保

上海界西至婁縣界西北西南皆婁縣界

葉謝鎮 在華亭東南地隸八保與蕭塘鄰其

外爲柘林處腹而勢衝北與閔行相策應西與

漕涇爲犄角明時倭寇入巢柘林嘗自此渡浦

至瓜涇而西今議屯鄉兵於鎮以遏之

漕涇鎮 在華亭縣東南七十里界於柘林金

山之間逼處護塘之內爲鹽徒淵藪其操艘出入波濤嫻習如御馬海賊頗畏之往年倭寇內犯嘗被此地鹽艘驅迫小島中圍之數匝焚舟絕糧賊大窘遁去故其時練鄉兵之議有司請擇本鎮著姓使得部署竈丁結立團營以自爲守一時亦暫行之

婁縣汛地 南至金山衛平湖乍浦界西南至

風涇嘉善界西至泖青浦界西北至章練塘長

洲界北至塘橋青浦界東北至泗涇華亭上海

界東及東南皆華亭界

泅涇鎮 爲婁縣巨鎮古於此置大盈務東通黃浦西通泖湖水寇睥睨之地也設泖橋巡司在鎮巡緝以其南遵水達海鹽平湖北從泖達蘇州嘉興鹽艘出沒便利故駟魁大猾號名暴橫亡命作姦之徒趨之爲窟云

張涇鎮 隸婁縣七保去縣南五十里宋人堰海十八所之一也浦東場鹽課司舊設於此後以牢盆相遠別建官衙於堰南鎮有陸路北通

府治南通金山可以直達間有支河斷港置石梁數十以聯之無事以通往來有事可以策應昔年倭難時咸議金山離府太遠兵勢太孤欲特遣重兵一枝屯練於此爲金山聲援誠計之得也

上海縣汛地 東至川沙堡濱海西至七寶鎮華亭青浦界南至烏泥涇閔行華亭界北至眞如柵橋嘉定界東南至南匯所華亭界東北至吳淞所嘉定界西南至莘莊華亭界西北至盤

龍青浦界

新場鎮 在上海十九保距下沙九里一名南下沙元初遷鹽場於此故名今為下沙場鹽課司場課為兩浙最往時賈販特盛為海寇窺伺之地曾設備云爾

周浦鎮 在上海十七保縣東南三十六里阻海之三甲五甲昔時相挺為暴招撫乃定今遺風猶有存者地連川沙諸處臨浦要害之一也
閔行鎮 在上海十六保西為橫灤指為要衝

者以其當上海西南乃南匯陶宅諸處渡浦入府之通衢也地勢與葉謝相對峙設備則聲勢相應援昔年倭寇時嘗屯兵以守之

烏泥涇鎮 在上海二十六保界兩縣間設稅課局地當上海正南與浦東三林周浦二鎮相望議備海者謂賊若自二鎮渡浦而西可直犯縣治須於此設備以遏之

七寶鎮 隸三十五保在華亭東北上海西南青浦東南界址為三縣分轄而黃浦自龍華港

入經蒲匯塘水道以至鎮則達泗涇入郡矣上海西門舉足三十六里陸路以抵鎮亦達泗涇入郡矣地方有警通聲息便策應其在此乎

青浦縣汛地 東至七寶鎮上海界西至澱山

湖長洲界南至鳳凰山華亭界北至白鶴港嘉定界東南至泗涇華亭界東北至楊林寺嘉定界西南至金澤嘉善界西北至千墩港崑山界廣富林鎮 在青浦三十八保爲入郡之孔道郵傳往來之要衝

黃渡市 在青浦三十一保去縣四十五里臨吳淞江之上若寇從江而來或西犯青浦此其必經之道而北岸卽屬嘉定設備之策宜兩縣集鄉兵守之

金家橋 在青浦四十九保去縣西北十二里西界於崑山長洲兩境爲逋逃淵藪不法亡命彼此竄匿又逼處江濱盜防宜嚴須兩郡協應遏之

金澤鎮 在青浦四十二保與澱山對峙四面

皆湖泖又蘇境浙境之水鄉交會故鹽盜出沒
焉向設巡司在鎮如有事此爲水道要害所當
議應援於蘇浙者也

雙塔王巷 在青浦四十二保去縣四十五里

自松至蘇水道必由之境四面湖蕩曠野盜嘗
不測土人多駕船爲生或務漁爲業熟水道有
議以保甲之法聯合漁舟盜發責令救擒是或
弭盜之策也昔年倭寇從此趨蘇亦爲要害之
一

金山衛陸營唬船八隻每隻捕盜一名舵工一
名船兵一十二名俱于該營陸兵內抽撥蓋此
船輕捷易使萬一海內有事即可抽出哨探但
該衛沿海一帶皆鐵板硬沙最難泊船故不設
舟師明萬曆十九年關白報警議設水營沙船
四十隻雖以金山爲名原未停泊金山後裁減
至一十四隻又改造唬船十隻汛時遠哨羊山
等處汛畢收泊李家洪嗣因本府黃浦鹽盜生
發議將各船汛畢撥守黃浦一帶蓋此浦係漕

船商舶日夕往來要路藉此把守最為得策
兩京太僕寺所屬該每年比較府衛州縣牧馬
共三百八十八處其不比較衛分二百九十五
處金山亦在不比較數中每五年造馬騾文冊
送南京府部

金山衛五所屯種原派總旗每名種田三十畝
小旗每各種田二十四畝軍人每各種田二十
畝總小旗軍人俱每名歲納夏秋子粒六石內
夏稅麥三石秋糧米各一石公差漕運減免三

石納麥一石五斗米豆各七斗五升每納一石
加耗五升入倉作正支銷見松江府備照冊
本衛左右前後四所并守禦松江青村南匯共
七所屯種田地俱坐落上海縣十九二十等保
地方共該屯田旗軍餘一千七百二十名田三
百五十二頃八十四畝原該子粒一萬三百二
十石除運糧旗軍餘四百七十名免一千四百
一十石實納子粒八千九百一十石凡子粒俱
運赴本所倉交納收貯聽放本屯官軍俸糧

本衛前後左右四所該屯田旗軍餘六百二十四名田一百二十七頃八十八畝坐落上海縣十九二十保原該子粒三千七百四十四石除運糧旗軍餘一百名免三百石實納子粒三千四百四十四石

本衛軍例免漕運嘉靖三十二年巡撫彭黯巡按孫慎會奏言南方衛所沿邊者戍腹裏者運制也邇年迺以松江所運船二十艘改派金山衛及青南二所代運邊腹互失其職宜遵舊制

部覆報可復舊至萬曆間復有議及者寢不行

松江府物產考一

府志

穀屬

稻 宜水一名稌或作稞上海最早有六十日
稻百日稻等種今更有五十日稻

香粳 七月熟米粒小而性柔類糯有紅芒白
芒二種又一種曰香子色班粒小以三五十粒
入他米數升炊之芬芳可愛亦謂之香粳

早白稻 一名小白五月種八月熟皮白米赤
早中秋 一名閃西風八月半熟白而大

中秋稻 四月種八月熟

晚白稻 一名大白九月熟

箭子稻 粒長細色白味甘香稻上品九月熟

紅蓮稻 五月種九月熟皮赤陸龜蒙詩遙為

晚香吟白菊近炊新稻識紅蓮即此

穠稔稻 五月種九月熟皮莖俱白米色班粒

長性硬或以為勝紅蓮云

早烏稻 五月種九月熟皮赤米白又有晚烏

紫芒種 五月種九月熟紫殼白米

深水紅 六月種九月熟

烏口稻 色黑晚熟耐水與寒今呼為冷水稻

秬 粒稍細耐水旱

六十日稻 三月種五月熟米小色白一名帶

犁回

百日赤 三月種六月熟一名挈犁望

小秬 一名早秬三月種七月熟

大秬 即晚秬四月種八月熟

金城稻 高出所種米紅而尖性硬今呼為赤

米穀之下品國語註謂米之姦者

白花珠 性軟而香五月種九月熟

糯 黍屬可爲酒一名秣汜勝之云三月秠四月種秠

秋風糯 卽冷粒糯種宜良田大暑節刈秠黃

米白粒圓色最難變每歲代晚稻輸租故一名

謾官糯不宜釀酒

金釵糯 米粒長最宜釀得酒倍多三月種七月熟劉夢得詩酒法得傳吳米好

趕陳糯 四月種七月熟米粒最長

小娘糯 四月種八月熟不耐風水故名

矮兒糯 四月種九月熟粒白而大苗最短

蘆黃糯 卽晚糯粒大色白芒長熟最晚色易變釀酒最佳今俗名泥裏變

羊鬚糯 四月種九月熟穀多芒長

羊脂糯 五月種十月熟色白性軟故名

鵝脂糯 亦以色故名四月種九月熟

虎皮糯 色黃五月種十月熟

稌 稷也高鄉種之其色如蠟謂之黃稌苗類
黍穗如稻

粟 亦高鄉所種北人謂之小米江東呼為粢
許慎云粟之為言續也續干穀也

蘆粟 似薏苡而高有二種杭者穗直而疎糯
者穗環而密

雞頭粟 四月種八月熟節間有赤色鬚結實
纍纍如珠一名珍珠粟又名天方粟又名玉麥
又一種七月前即熟者其莖較短

麥 蘇頌曰大小麥秋種冬長春秀夏實具四
時中和之氣故為五穀最貴地暖處亦可春種
至夏可收然較秋種者四時不足微有毒素問
曰麥屬火心之穀也

大麥 古謂之牟周禮九穀之一季時珍曰牟
者大也

小麥 古謂之來許氏說文曰天降瑞麥一來
二辨象芒刺之形天所來也

赤麥 有早晚二種

白麥 亦有二種

白穠麥 俗名園麥有赤白二種

舜歌麥 俗名火燒頭

火燒麥 無芒

雀麥 一名燕麥

蠶豆 一名寒豆九月種明年蠶時熟故名

豌豆 一名小寒豆九月種明年三月熟蜀中

以此細磨麪蒸食可以救荒劉夢得詩兔葵燕

麥搖春風

蕎麥 粒似黑牽子七月種九月熟得霜即枯

無霜即大熟

豆 菽也角曰莢葉曰藿莖曰萁種類甚多皆

以夏至前後下種苗高三四尺葉團有尖秋開

小白花結莢長寸許經霜乃枯汜勝之曰夏至

種豆不用深耕豆花畏日見則黃爛根焦

刀豆 以形似名莢嫩時採可入醬為蔬相傳

醬瓠中有髮入刀豆則化為水

江豆 色赤黑四月種六月熟其種有三

龍爪豆 花葉如裙帶豆蔓生莢如蠶豆而大然不甚佳人家亦間有之

赤豆 有大小二種

六月白 莢密子細白豆中熟最早

青豆 七月熟色青

白香圓 白豆之最大者以色味形名

茅柴赤 凡豆不宜土肥肥則莢稀此種且不用耘茅草之地叢生極盛故名

南京黃 以種自秣稜故名

隨稻黃 九月中方香綻可食

砂仁豆 色紫味香豆中上品

紫羅豆 色紫粒小味香俗謂紫香圓又一種有青黑花紋名僧衣豆

黑豆 色純黑粒大

白藟豆 吳人呼爲延籬豆七月生諺云籬豆花開袂子來言寒候將至也亦有五月生者

芝麻 卽胡麻有黑白二種植物中最爲多子一名巨勝亦謂之黃搗之常服能長生道家以

為飯陶隱居言八穀之中胡麻最良

蔬屬

蓴菜 出華亭谷及松江甘滑宜芼羹葉似露
葵四月生名雉尾蓴最肥美莖細如釵股短長
隨水淺深名綠蓴五六月用之秋冬有蝸蟲著
其上食之損人水凍蟲死仍可食陸機初入洛
見王濟濟指羊酪曰吳中何以敵此機云千里
蓴羹末下鹽豉齊高帝置酒設蓴膾崔思神曰
此味故為南北所推沈文季曰千里蓴羹豈關

魯衛然則千里末下皆吳中地名也

芹 生于水濱紫莖綠葉有節其氣芬芳杜甫

詩香芹碧澗羹

蒲白 亦名蒲笋又名蒲笋初生嫩芽醋漬作

菹甘美

菱白 卽菰也一名菱手生水中八九月中心

生臺如小兒臂甘美可啖又一種中心抽苗生

米可作飯卽彫胡米

苳 所結子味甘名苳酥揉粉作糕曰苳酥糕

今不復見

菘菜 唐人所謂闊葉吳菘巨根蜀蒟埤雅云
凌冬不彫四時常見有松之操昔人有言秋末
晚菘菜中最為常食一云即白菜

白菜 其形類菘莖闊而短正月中下子謂之
看燈菜七八月分種至冬而盛謂冬旺菜別種
莖似箭筈曰箭筈菜並鹽藏備冬春生薑搗食
旁復生苗作花夏初取其子壓油謂之油菜冬
月畦圃間塌地而生曰盤科菜烹苺尤佳

烏菘 春末最盛盤根尺餘宜煮食暴為乾蔬
不堪苺羹也色淡者曰青菜

芥菜 似菘而有毛其子研為膏螯舌芳辛古
謂之芥醬祛皮裏膜外之痰陸佃云望梅生津
食芥墮淚是也一種矮小者曰黃農芥味亦香
美又有細莖扁心名銀絲芥亦名佛手芥上海
顧氏製為菹經歲味不變名顧菜

波菜 亦曰波稜菜葉如箭簇根色赤味甘美
種須月末經朔乃生相傳種出波稜國因名俗

加草失其義矣

莧菜 埤雅以字從見言莖葉高大而見也有紅白紫三種爾雅蕒即赤莧

甜菜 北人謂之若蓬葉厚而膩莖甚短冬種

至春三月收煮暴乾相傳有毒又云過清明葉膜間有蟲如虱驗之良然

生菜 叢生如樹細切加熟油生食因名

薺菜 處處有之古謂之甘菜師曠曰歲當甘

甘草先生謂此一名護生草釋家取莖作挑燈

杖以避蚊蛾

芥藍 葉厚如若蓬色穠翠如藍味極腴美出

北地者根大如芋可入醬食閩中有之近歲閩人攜其子藝之學圃遂傳郡中

紫花芥 生庭砌間春開紫花顧志云近歲吾

鄉始有之即蔓菁一名諸葛菜

金花菜 春時叢生田畔開小黃花一名盤岐

頭俗呼草頭春初民間遍食之相傳周文襄往鄉訪蔣給事檢菴畱飯出菜一碟文襄食而甘

之問何物以金花菜對比回郡復索無以應問
蔣之侍者知即為草頭乃知其名實始於此先
輩清儉亦可風矣

藻菜 出浦東橫沔一帶即毛詩采藻也土人

霜後輒搯波擷采下鹽豉以供食飲香脆可啖

韭 禮記稱韭為豐本言其美在根也秋晚分

栽至春初擷以薦新丁祭未薦市不敢賣

葱 五葷鍊形葱其一也齊民要術種葱良地

三翦薄地再翦八月止不止則葱無袍而損白

自太湖種曰湖葱入藥用山葱湖葱食用冬葱
漢葱

蒜 有二種別以大小俱八月種冬春食苗夏

初食臺五月食根秋月收種久食損目嵇康養

生論云葷辛害目正指此也

胡蘆菹 根如蘆菹長而尖色赤味甘盛于冬

月出吳松江南北切作齏最佳

萋蒿 葉如艾而莖圓叢生水濱性涼春時擷

苗食之大招云吳酸萋萋不沾薄只言其調也

茼蒿 八九月下種冬春採食肥莖花深黃似
菊葉似白蒿其味辛甘葉如萋蒿
苦蕒 俗呼苦馬野生人不甚食

蒿苳 正二月種宜肥地葉似白苳而尖色稍
青折之有白汁黏手四月抽莖高三四尺剝皮
食之最佳糟食亦良或用鹽拌壓乾加以玫瑰
花瓣芬芳可愛名曰蒿笋李時珍曰有毒百蟲
不敢近蛇虺觸之則瞑目不見物人中其毒以
薑汁解之杜甫詩苳兮蔬之常隨事藝其子

芫荽 一名胡荽香菜也葉如碧芸而香點茶
多用之

藜荷 俗呼甘露子莖葉如薄荷能治蠱毒冬
月取根雜鹽菜藏之味極甘脆急就章曰老青
藜荷冬日藏謂此

茄 有紫白二種王子年拾遺記曰一名落蘇
二月種苗抽移栽高二三尺葉大如掌自夏至
秋開紫花五瓣相連五稜如縷黃藥綠蒂茄葉
摘布路上以灰圍之則子必繁謂之嫁茄

雷蕈 出沿海草蕩雷初鳴有暈幅三五丈名
草味類蕨菇有小毒以生薑同煮色變者不可
食

天鮮菜 亦出草蕩間夏雨過即生

山藥 即薯蕷壅肥土乃榮盛赤莖細蔓五月
開白花八月刷食味甘腴有秔糯二種

芋 卓文君云野有蹲鴟即此當心出苗者為
芋頭四邊附之而生者為芋子二月種八九月
刷食之味膩重稍遜山藥冬月煨芋魁食之更

香美有水旱二種

香芋 皮黃肉白莖葉如藕豆而細味芳香

落花生 蔓生五月開黃花落地中結實似芋

霜雪後始甘

慈姑 植稻田旁其根散生其葉上銳下岐其
實生土中芳香可下酒一根歲生十二子如慈
姑之乳諸子作茨菰非

百合 有二種味俱佳名麝香者花清芬可愛

黃獨 多出東鄉一名土芋蔓生葉如荳其根

圓如卵肉白皮黃可蒸食霜雪後味方佳杜甫詩黃獨無苗山雪盡

毛團頭 此種近年方有葉及藤俱與山藥相似根圓大如斗味甘略帶苦絕似香芋子亦可食相傳毛團頭祖師煨石子啖後流傳此種其薑 非郡素產而好事之家或一種植終遜宣州諸地

笋 一名竹胎種類不一鄉俗俱用園笋出侖山者香味如蘭惟護居竹者鮮香第一燕笋次

之餘笋雖佳或兼味苦處處俱有吳松江南北諸處尤佳

瓠屬

西瓜 通志云松西瓜出黃土橋者佳今華亭

南橋有橄欖瓜形如橄欖味甚甘二月下種蔓生七八月實熟有圍及經尺者當將熟時種植之人樹茇舍晝夜坐守以防人獸竊食上海柵

橋梅源市閔行周浦出者種亦佳大者如枕名枕瓜新市有一種掛棚生者實小而甘名雪瓜

甜瓜 名酥瓜擇堅脆者入醬為菹熟者名酥瓜色淡黃者名密筒瓜皮黃如金大如鵝子者名金瓜青黃雜班者名畫眉瓜通謂之香瓜

東瓜 大如枕色青碧最晚熟每風寒霜重葉凋蔓枯皮生白粉望之如伏甯穰宜燥絮亦可作蜜煎一作冬瓜

筍瓜 一名楚瓜即生瓜有青白二種可醃漬藏作鹽豉

王瓜 在二月下種三月生苗引蔓四月開黃

花結實圍一二寸長至尺許青色至老則黃赤色生熟可食兼蔬蔬之用李時珍曰作王瓜非是當從黃字

絲瓜 二月下種蔓延竹樹間或作棚架花五出瓜徑寸許長一尺內外深綠色毛羹充蔬俱可老則大如杵筋絡纏綿如織經霜乃枯

南瓜 形扁有稜色紅經霜後收置暖處可留至春時不宜生食味如山藥同猪肉煮亦佳

北瓜 形稍長帶尖鄉人名飯瓜

壺盧 一名葫蘆匏也五六月開花有甘苦三種甘者可食苦者至秋堅實可作器記曰器用陶匏埤雅曰壺性浮腰之可以涉水其形不一有圓扁如盒者有長柄如杓者有細腰如浮圖頂者有宛頸如鶴者剖為飲酒器呼鶴瓢世說新語二陸初入洛詣劉道真禮畢無他言但問東吳有長柄壺盧得種來否二陸失望

瓠子 長者形如冬瓜國語云苦瓠也

苦瓜 俗名錦荔枝初生可入醬食長者四五

寸短者二三寸青色皮上痲癩殼狀如荔枝經霜則黃紅色有子如瓜子可食微苦

果屬

杏 葉圓而有尖二月開紅花結實類梅者味酸類桃者味甘埤雅云北人不辨梅杏

梅 花開于冬實結于夏得木之全氣故其味酸所謂曲直作酸花態幽香絕人種類不一梅源市周圍數里郡邑咸取實于是

枇杷 多產洞庭山人家種植僅高二丈餘肥

枝長葉陰森幽靜經冬不凋白花尤濃香可愛
 棗 埤雅云大曰棗小曰棘以山左中州者為
 佳松郡間有種植止供生啖不堪曬暴久藏也
 石榴 古今注名丹若有紅白二種經霜後坼
 裂其子如瑪瑙又有如水晶者俱帶甘漚潘岳
 曰天下之奇樹九州之名果

櫻桃 爾雅曰楔荆桃也初熟時鳥飛啄有白
 頭翁者尤好之即禮記所謂含桃也一名朱櫻
 王維詩紫禁朱櫻出上欄

桃 最易生諺有白頭種桃之語然亦易蠹蝕
 種法三四年後長而皮急以刀剔去其脂可復
 活數歲有扁桃墨桃金桃五月桃鷹嘴桃半筋
 桃李光桃雷震紅諸種惟以上海顧氏露香園
 水蜜桃為第一皮薄漿甘入口即化其樹以秋
 分後剗枝接種非老本也今種甚繁

李 品與桃埒有粉紫黃姑二種味有甘酸苦
 漚四種

林檎 一名花紅二月開粉紅色花六七月熟

又名來禽

梨 樹高二丈許尖葉光膩有細齒二月開花
白如雪六出上已無風則結實必佳畏寒每于
樹上包裹過冬摘之乃妙

柿 有方柿綠柿銅盆海門蜜罐牛奶諸種其
樹最久七寶以北沿村皆植之為最盛惟海邑
所產為第一最佳者名朱紅扁花色紅皮薄三
次接植內核全化真果中上品

銀杏 樹高二三丈葉薄縱理儼如鴨掌二月

開花成簇青白二色二更開花隨卽隕落人罕
見之一枝結子百十狀如棟子經霜乃熟取核
為果其仁綠色火爆可食歐陽修詩絳囊初入
貢銀杏貴中州是矣

柑 種者甚少瓢微酸有香柑一種出莘莊曰
乾柑味極甘無汁以刀剖食另一種小而圓如
豆俗呼金豆小而稍長曰金柑稍長大如彈丸
者名彈柑又名羅浮柑

橘 遠產衢州福建近產洞庭山郡或偶植數

十本經霜懸顆朱實纍纍偶值沍寒僵槁立盡
有金橘蜜橘諸種皮薄味甘為上

橙 與橘同象皮色深黃芳香宜點茶瓢味酸
不甚食閨中用以拭面可免龜手裂膚

香椽 橘類大如杯盃香氣郁烈裝置密室清
香發起與佛手柑比或取其瓢點湯尤甘香

葡萄 有紫白二種白者名水晶毬味鮮甘
藕 湖泖陂澤間多有之惟出薛山前羅家池

者尤美蘇產不及也今無

蓮實 花紅者實小而甘白者大而味淡

菱 窪田及人家池沼多種之有青紅二種紅

者最早七月初即生為水紅菱稍遲而大者為

雁來紅青者為鸚哥青大者為餛飩菱極大者

為蝙蝠菱最小者為野菱出郡西草長浜者佳

芡 俗名雞頭出周家草者佳

地栗 一名葶薺即鳧芡也海邑產者甚佳出

水田中

核桃 即胡桃種植亦僅見外裏青苞爛去外

苞擊核而食帶澀

無花果 葉似梧桐不花而實形如烏頭中有
米粒味柔甘不鮮

欽定古今圖書集成方輿彙編職方典

第七百卷目錄

松江府部彙考十二

松江府物產考二

職方典第七百卷

松江府部彙考十二

松江府物產考二

府志

藥屬

枸杞 一名苦杞其莖幹三五尺作叢六七月
生小紅紫花隨結紅實微長如棗核其根名地
骨皮詩云集于苞杞是也

菖蒲 春生青葉長一二尺許其葉中心有脊
狀如劍一寸九節者良亦有一寸十二節者二

三月開細黃花成穗多服令人延年益智

麥門冬 陶弘景曰根似穉麥故名葉青似莎

草長及尺餘四季不凋根黃白色有鬚在根如

連珠形四月開淡紅花吳地者尤佳

香附 卽莎草根韭畦藍地最多

瓜蒞 三四月生苗七月開花淺黃色結實在

花下九月熟其根直下潔白如雪名天花粉

牽牛 陶弘景曰此藥始出田野人牽牛謝藥

因名花如扁豆微紅帶碧有黑白二種

薄荷 揚雄甘泉賦作芟括俗稱薄荷今存之

二月宿根生苗清明分種方莖赤色蘇州所蒔

莖小而氣芳豫蜀俱不及

紫蘇 爾雅名桂荏二月下種八月開細紫花

成穗作房九月半枯時取子以表裏俱紫者良

車前子 詩名芣苢陸機詩疏云此草好生道

旁故有車前之名夏采苗秋采實除入藥外亦

有采食者俗謂之蝦蟆葉

天南星 一名虎掌以其葉似又李時珍曰其

根圓白形如老人星故名三四月生苗高尺餘
七月結子作穗九月采根四畔有圓芽

金沸草 本旋覆花葉似水蘇花黃如菊二月
以後生苗水次長一二尺其根細白采花去藥
用以佐藥

艾 王安石字說艾可又疾字從艾又草部也
故從草用灸百病以苗短為良五月五日采取
陳久者益妙

夏枯草 一名夕句又名乃東冬至後生葉三

四月開花作穗苗高一二尺有養厥陰血脉之
功

澤蘭 根紫黑色如粟根二月生高二三尺莖
幹青紫色葉四稜冬生卑溼地

槐實 槐有數種功用有別四月開黃花六月
結實七月七日採嫩實十月採老實李時珍曰
槐虛星之精服之長生梁書庾肩吾常服槐實
年七十餘其驗也

甘菊 有二種花大而香者為甘菊生金匯橋

者良小而黃者為黃菊花小而氣惡者為野菊
初春布地生細苗夏茂秋華味甘故名

瞿麥 子頗類麥故名苗高一尺葉尖小青苞
根紫黑色形如細蔓菁花紅紫似映山紅二月
開至五月七月結穗廣雅稱苾萎

半夏 禮記月令五月半夏生蓋當夏之半也
故亦名守田二月生苗一莖端三葉淺綠色祛
痰聖藥

高良薑 陶弘景曰始出高良郡故名春生莖

莖如薑苗而大高一二尺許花紅紫色如山薑
芎藭 左傳所謂山鞠窮亦名薜蕪冬夏叢生
五月花赤七月實黑九十月採之乃佳舒攣壯
骨以蜀產為勝本地所產力薄不能效

大薊 薊猶髻也其花形似莖高三四尺花頭
如紅藍花而青紫色薊門以薊得名大抵以北
方者良

紫花地丁 夏開紫花結角平地生者起莖溝
壑邊生者起蔓開小白花者瘍家功效

山慈姑 卽金燈花根西陽雜俎云金燈花與葉不相見又謂無義草冬月生葉如水仙而狹二月中葉枯而花發四月苗枯取根用

菟麻子 夏生苗葉似葎草而大莖赤有節高丈餘秋生細花卽結實殼上有刺夏採莖葉秋採實冬採根

豨薟草 楚人呼豬爲豨呼草氣辛毒爲豨如豬而味豨故名葉似酸漿而狹長花黃白色本草云有輕身耐老之功俗呼火吹草

馬蘭 葉似蘭而大花似菊而紫叢生道旁二月生苗赤莖白根長葉而有刻齒狀花苦不香人咸採洵爲俎

香薷 有野生有家時三月種之可充蔬品葉如茵陳花茸紫凡四五十房爲一穗頗有香氣淡竹葉 春生苗高數寸細莖綠葉儼如竹八九月抽莖結小長穗花開冷翠可愛

生地 二月生葉有皺文而不光高者尺餘低亦三四寸其花紅紫色亦有黃花

牛膝 春生苗莖高二三尺青紫有節如鶴膝
節上生花作穗秋結實甚細以根長大至二三
尺而柔潤者為佳

大黃 正月生青葉四月開黃花有推陳致新
之功亦稱將軍

商陸 有赤白二種白者入藥赤者可造厭勝
以視鬼神廣雅謂之馬尾易謂之莧陸即此

何首烏 一名交藤又名夜合葉有光澤形如
桃柳法製服延年烏髮輕身駐顏其功效不可

具述

香附子 即莎草根

蛇牀子 薏苡仁

荆芥 嘉禾志出松江者良

木屬

桑 有數種地產止白桑葉大如掌可飼蠶吾

松紡織木棉不力蠶事有稻田而無桑林乃夏
稅有絲綿之賦並未始出于桑也

榆 亦數種惟細葉者堅韌宜為農器謂之綿

榆白者名粉榆榆莢仁作糜羹令人多睡嵇康所謂榆令人瞑也

黃楊 枝葉攢簇上聳葉似初生槐芽不花不實四時不凋性難長俗歲長一寸遇閏則退今試之但閏年不長耳其木堅膩可作梳雕印凡取伐須以陰晦夜一星不見則不裂

槐 蘇頌曰有數種葉大而黑者名懷槐晝合夜開者名守宮槐生于季春五日而兔日十日而鼠耳更旬始規二旬葉成

楊柳 在處有之以垂條拂地者為佳楊枝葉短柳枝葉長陶朱公曰種柳千樹可供柴炭其嫩芽可作飲湯

檀 最堅重有黃白二種農時以放葉開花為雨候俗謂等水檀花色正紫其根如葛

松 李時珍曰松樹磔砢修聳多節其皮粗厚有龍鱗形二三月抽蕤生花垂四五寸採花蕊搓作粉可糝入晶飯清芬絕人一種名栝子松惟亭林寶雲寺佘山昭慶寺二本極大今亡

柏 側葉赤皮魏子才六書精蘊云萬木皆向陽而柏獨西指蓋陰木而有貞德者其枝指西猶鍼之指南也

杉 似松而葉短身形上聳而直幹

檜 柏葉松身又一種枝細而長玲瓏下垂謂之瓔珞檜質堅紋細可作楫櫂

棘 李時珍曰獨生而高者曰棗列生而低者曰棘叢高二三尺莖葉與棗似

楮 俗稱穀樹楚人呼乳曰穀木中白汁其黏

如乳故名績皮可為布又可擣為紙或曰皮斑是楮皮白是穀良然

烏柏 樹高數仞葉似梨杏五月開細花結子色黑人家雜種陂澤旁採子蒸煮取脂澆燭貨之子上市脂勝于仁霜葉朱赤

椒 人家沿蔓籬落間結子甚細都無芳香終遜川蜀之產

石楠 一名柟木性堅而善居水江南造船皆用之直上童童若幢蓋之狀其花赤黃色

冬青 身葉俱似桂凌寒不彫一名女貞亦謂之萬年枝

梧桐 蘇頌曰白桐一名椅桐遁甲書梧桐可知日月正閏四月開嫩黃小花其莢長三寸許五片合成老則裂開如箕謂之橐鄂其子綴于橐鄂炒剝如菱芡

樸 似榆而葉大俗呼樸榆散材也

棕櫚 木高丈許無枝條葉大而圓有如車輪萃于樹杪其下有皮重疊裹之每皮一匝為一

節二旬一採皮轉剝轉生六七月生黃白花八九月結實作房如魚子九十月採皮用其皮作繩入水千年不爛棕本作櫟

柘 埤雅柘宜山石故從石叢生幹疎弓人取材以柘為上

椿 樹高聳而枝葉疎與樗不異葉香者椿葉臭者樗也

梓 埤雅梓為木中之王詩小雅維桑與梓梓似楸也又名香梓其角細長如箸亦櫟類

棟 有二種黃棟抽嫩芽時鹽漉漬點茶最香
旨至三四月開花紅紫甚芬郁

榮 俗名烏櫟又名夜合其華每夜必合色如
紅絨又名合歡嵇康養生論合歡蠲忿萱草忘
憂蓋指此也

竹屬

篾竹 本末停勻節朗梢長解為篾作繫束之
物甚堅密笋色碧宜作脯煑食不甚佳

黃菰竹 節日疎聳皮黃力韌為篾器良材

笙竹 古稱出吳越即今晚笙李時珍曰笙竹
茹可治勞熱梅堯臣詩侵天笙竹溪西東

大頭竹 即笙類質稍瘦皮略黃笋味帶苦食
時不宜生水洗

方竹 據顧文僖清舊志云澧州多以此為臺
桌昔時園圃多植之方而有節鬚芽四出松郡
亦僅見

斑竹 青質黑文點點如畫相傳湘君泣于蒼
梧之野淚痕灑竹而成未可盡信但秀挺可愛

紫竹 初解籜猶青久之始變亦不甚紫微帶
黑色

黃金間碧玉竹 逐節色青黃相間可玩

燕竹 竹笋最早燕至即生故名笋味甘腴

護居竹 俗名哺雞竹人家多植屋後故名皮

日休公齋新竹詩有云笠澤多異竹移之植後

楹陸龜蒙詩云昔者尙借宅倘來處賓庭俱寓

護居之意笋白如截肪甘香潔白在諸笋之上

象牙竹 以笋白得名

鳳尾竹 以形似得名宜庭除植之或瓦甌中

殊有蕭疎之致

慈竹 即桃枝竹俗呼慈孝竹鄉聚家家種之

陸機草木疏南方子母竹是也竹譜云慈竹笋

四時俱生寒則顯生溫竹夏則隱生清竹有子

母相生溫清之義杜甫詩慈竹春陰覆是也

海桃竹 青龍人家有之竹屋多以為椽經久

不蛀

王莽竹 種最大而節間促二十餘節方生枝

葉近根有一錢痕俗傳王莽藏銅瓦其中以爲
識云

毛竹 筍竹 金竹 銀竹

觀音竹 棕竹 羅漢竹

花屬

牡丹 自宋來盛于吳下吾鄉明初曹明仲所
譜十五品最奇並傳洛京舊種近歲所植惟壽
安樓子二三種深紅已爲難得餘不復見矣
芍藥 有三種桃紅重臺者爲上品純白者爲

中品上海人家有一叢四五十朶者有紅樓子
間白名玉帶圍

菊 品類滋多元李明復菊莊所蒔三十種各
有名可譜

薔薇 有紅白雜色皮日休泛舟詩淺深還看
白薔薇有一種黃薔薇種甚貴格韻尤高

郁李 瑞香 迎春

辛彝 卽木筆無色無香亦屬下品

金鳳 卽鳳仙有白紅紫三種色不甚艷亦無

香子名急性

萱 卽鹿葱有錦蜜二種用鹽湯漬之可充蔬

菜中物

錦帶 石竹 玉簪 金錢

芙蓉 卽拒霜有大紅桃紅白三種更有四面

俱花者又有一本而自朝至暮三變其色者名

三醉芙蓉

水仙 有單葉重臺單葉者金盞銀臺香與態

俱可愛

罌粟 花有五色四月花開嬌艷非常但不耐

久一種稍小名虞美人

洛陽花 一作落秧或云卽麗春

刺桐 金梅碗

玫瑰 花色正紫穠香郁烈搗之可作糖醬極

美

紫藤 卽紫葳柔枝延蔓不能自聳挺幹大率

施于灌木開花作房垂如瓔珞又如紫步幃

蛺蝶花 紅色卽射干

高良薑 青蓮色

蒼荀花 卽白梔子

蜀葵 種各異有五色及千葉單臺又小者名錦葵品最下

黃葵 俗呼黃羅傘

秋海棠 最鮮妍可愛

紫槐 俗名鬢邊嬌

紫荆 色紫天趣絕少亦無香味花中最下品
木槿 有紫白二種一名日及又名朱槿

桃花 花色豐艷千葉而大紅者名絳桃白者

碧桃 又有人面桃諸種大抵色麗而姿粗

梅花 有紅梅綠萼玉蝶二種玉蝶有西施照水二名上海西北梅源市種植最多每春時花

開晴雪千村暗香十里不減吳中鄧尉

臘梅 花開冬杪且近梅時故名以磬口檀香種爲貴荷花口爲次九英最下香氣酷烈

海棠 以棠梨過枝接本者爲佳最爲妍麗名西府海棠若垂絲貼梗其媵婢也郊西廣濟橋

東北少叅陳承一園有西府海棠蔭畝餘開時
最為穠麗多游觀者

玉蘭 大率辛彝過枝接成色白璘珣清香披
拂臨風亭亭可喜

繡毬 另小者為麻毬團簇周圍色碧白

丁香

木香 枝葉如薔薇有黃白二種其花芳馥異
常宜于閨閣中簪戴

月季 色淡紅月開一度隆冬霜雪中亦不輟

佛見笑 桃紅色開時如笑

棣棠 開小黃花無香盈盈如黃蝶

荼蘼 花色白微香暮春方開唐人詩有開到

荼蘼花事了句

百合 有虎皮麝香二種麝香花色佳虎皮根

實可啖

荷花 人家植陂塘中夏月抽蘂開花亭亭出

水饒有風致亦宜植瓦沼中

梔子花 梵書名薝蔔花香甚郁烈

虞美人 草本中最柔弱者相傳虞姬滴淚所化其穠艷相似

石榴花 有大紅桃紅淡白三種千葉者名餅子石榴色如火不實

紫薇 俗名百日紅亦有淡紅藍白諸色夏開至秋暮不斷

木樨 有黃白紅三種紅者謂之丹桂取其花焙茶作餅藏之經歲香不歇

山茶 有楊妃寶珠紅白諸種春初百卉未榮

點綴庭堦殊有幽致

雜植

木棉 舊志云宋時鄉人始傳其種于烏泥涇鎮今沿海高鄉皆種之有白有紫有早有晚惟棉多核細者爲第一實方結尚青者俗呼花鈴子其方藥未花者曰花盤穰之晚結無棉者曰僵囊新花秤朶一朶重八釐以上者花貴不及八釐者花賤鄉人隨其大小驗之

藍 卽馬藍爾雅曰葳出青龍南北刈其葉漚

爲靛可以染青俗謂之青秧清明種五月黃梅時刈歲凡三四刈

斫青 藍類種自崇明至如蒿而紅多靛

淮青 斫青類種自淮靛早而紅

黃麻 苧麻 種之擷其皮皆可爲繩索

黃草 可織履

燈草 心白炷燈所用亦可入藥其殼編以爲

蓑今郊西水田多種之

蒲 作包以裹木棉細織者包米

蘆 可爲箔及蓆小曰葵大曰葭所謂蒹葭蒼蒼卽此

茶 佘山神山近皆種之

天竹 一名慎火又名天燭冬月結子垂垂如

赤珠名鬼面者尤佳

畜屬

牛 在畜屬土在卦屬坤爲陰故牛蹄坼病則立陽勝也起先後足臥先前足從陰也周禮謂之太牢內則謂之一元大武

馬 其字象頭髮尾足之形牡馬曰騶牝馬曰騾去勢曰騾名色甚多梵書謂之阿溼婆

騾 李時珍曰古文作羸從馬從羸諧聲牡驢交馬而生者曰騾牡馬交驢而生者曰馱馱驢 夜鳴應更漏善馱負

羊 土生者名杜羊最肥美董子曰羊祥也故吉禮用之內則謂之柔毛青浦艾祁產者美耳有兩環

豕 坎爲豕水畜而性趨下喜穢

犬 其用有三田犬長喙善獵吠犬短喙善守食犬體肥供饌豺見之則跪虎食之則醉 猫 李時珍曰字有苗茅二音自呼其名埤雅云鼠害苗而猫捕之故字從苗

雞 家雞屬陽先鼓翼而後鳴野雞屬陰先鳴而後鼓翼無外腎而虧小腸有五德之譽

鴨 本名鶩性質樸而無他心故爲庶人之贄曲禮云庶人執匹匹雙鶩也亦自呼名

鵝 有蒼白二色及大而垂胡者並綠眼黃喙

紅掌善鬪其鳴夜應更漏

禽屬

鶴 忘懷錄鶴惟華亭鶴窠村所出爲得地他雖有凡格也瘞鶴銘亦謂壬辰歲得之華亭鶴窠卽下沙至今多鶴嘗詢之士人實自海東來馴養久乃生雛以足有龜紋者爲貴韓偓詩正憐標格出華亭况是昂藏入相經又皮日休云華亭鶴聞之舊矣及來吳中以錢半千得隻鶴養以經歲後失而悼以詩

鴈 湖泖陂澤皆有之與野雞鷓鴣昔爲土貢

鷹 所謂爽鳩秋冬間土人設網張媒於東北諸山捕之間得翹俊直擬兼金其性爽猛而鷲

臥鳥 秋暮有之埤雅鴉大如班鳩綠色今謂

之畫鳥聲之誤也其肉美可爲羹臠又可爲炙因其來自海南因頓集林木若睡臥云又一種爲烏鴉白脰者爲鬼雀反哺者爲慈鳥

野雞 卽雉也出東南鄉草地一名華蟲因羽毛陸離故名又曰疏趾有痼疾者忌食烹爲脯

百全圖書集成卷之十九
臘以奉蒸嘗燕享

野鳧 出華亭陂澤間吳地記云石首冬化爲
鳧頭中有石一名鶩有小而好沒水者名鶩鶩
文雞 出草澤間以身有文彩名俗訛呼門雞
又稱悶雞或云卽蚊母鳥也

鶩鳩 卽班鳩俗名鶩哥雄鳩鳴晴雌鳩鳴雨
性慤孝而不能爲巢

鶩鶩

黃雀 每歲秋時山蕩北鄉有之吳地記小魚

長五寸許秋社化爲黃雀味腴美至則土人競
作鮓相遺服白朮者忌之同時西北山野間有
鳥名刺毛鶩肥美土人亦以爲珍品

鷓鴣 俗謂之灰鶴形如鶴而小蒼色

鶴 亦如鶴無丹頂不善唳

鵲 能報喜故云喜鵲上下飛鳴以音感而孕
季冬始巢名乾鵲

鴿 性淫而易合故名鴿者其聲也張九齡以
鴿傳書目爲飛奴

鵲鴿 百舌

鷺鷥 一名春鋤潔白而善為容集必飛舞而始下翅背有長翰江東人取為接羅又名曰鷺纒

鴛鴦 鶉鵒 鶉 姑惡

鸚鵒 俗名八哥五月五日取雛翦其舌圓形能作人言亦可取火

鴛 形如鶴毛羽相似頂不丹有雅俗之別 鶻 鷹之小者曰鶻

翠鳥 俗名魚虎子喜食魚盤旋波面一掠即得穴土為巢喙深紅項白

桑扈 俗名蠟嘴爾雅名竊脂蓄雛教以戲舞竹雞 懷古云泥滑滑多居竹林褐色多斑赤文味美如菌

烏鴉 大嘴性貪鷲鳴聲甚厲南人最惡之北人則喜

雀 一種名金雀色黃一種名十姊妹一種名黃頭善鬪一種尾短身小棲簷瓦間性最淫

布穀 卽鳴鳩三月穀雨後始鳴夏至後乃止
因其名呼之取脚脛骨懷之令人夫妻相愛五
月五日男左女右收帶之

獸屬

兔 禮記曰明眎言其不瞬而瞭然也爲食品
上味趨捷善走

獾 獾豚也俗名猪獾一種狗獾俱肥腴多膏
居丘墓深穴土人以獵犬捕之皮可爲裘

香狸 俗名野猫亦有麝香者筆毫用其脊

獺 多居水次以皮作冠或飾衣服垢膩不染
拭之卽去

獐 猪之屬獐類短尾尖嘴而黑色味肥

鱗介屬

鱸魚 生松江出長橋南者宜鱠潔白鬆軟不
腥在諸魚之上四五月方出長僅數寸狀微似
鰕而身有黑點巨口細鱗江中者四腮他處止
三腮體黑腮紅不甚雅馴味亦不及金谷園記
鱸魚常以秋仲從海入江羅隱詩鱸憶松江滿

箸紅卽是物也吳興志鄉俗以鱸膾爲盛饌每
遇上客新婚燕集必設此盤旬庖丁凌晨羣立
魚市視所買多寡而往裁紅縷白鋪成花草鸞
鳳或詩句詞章極其精巧造葢亦甚得法昔吳
都獻松江鱸魚隋帝曰金齏玉膾東南佳味正
此謂也又有骨淡羹每斫膾悉以骨熬羹淡而
有真味昔人珍膾至此

鯉魚 諸魚之長乃至陰之物其脊鱗一道從
頭至尾無大小皆三十六鱗風家忌食

白魚 葉氏避暑錄云太湖白魚實冠天下今
澱湖三泖皆有之本名白鰈形窄腹扁鱗細長
者六七尺頭腹最肥

青魚 亦作鯖以色名本地產甚少湖雲間人
鑿池種之取以作鮓卽五侯鯖也

鯊魚 吹沙而游呖沙而食體圓似鱣厚肉重
唇其尾不岐

鱧魚 俗名黑魚首有七星夜朝北斗有自然
之禮色黑北方之魚也陶弘景曰公螭蛇所化

然亦有子者性至難死猶有蛇性也

鮓魚 無鱗亦鱗屬頭尾身鬚俱相似惟鼻短

口亦在頷下

白鰯魚 長數寸形狹而扁如柳葉鱗細而勻

潔白可愛性好羣游取炙脯最堪下酒

虱蟹 其名不典大率是蟊基望潮之屬作羹

最鮮美但擣萬足以供一箸殊傷物命耳

米魚 大者三四尺少鱗有細黑文煮法與黃

魚等

鱗魚 形狹而長薄如削木質細鱗白吻上有

二硬鬚腮下有長鬚如麥芒味甘美

鰾魚 巨口細鱗質碧色肉味美誤鯁骨食橄

欖即愈蘇軾所謂松江之鱸正指此

鯽魚 埤雅云鯽魚旅行以相即故名鯽魚喜

俛泥不食雜物能補胃冬丹肉厚味佳

鰻魚 產泖湖中者大而美釋名云魴魚江浦

間生鮮肥異常魚

鮠魚 續志魚若披緇故名生淺水中似鯉身

圓頭扁骨軟性喜食泥其子滿腹有黃脂味甘美郡人於潮泥地鑿池仲春取盈寸者種之秋而盈尺池魚之最海中亦有之

鱠殘魚 博物志吳王江行食鱠有餘因棄之中流化而爲魚亦曰吳餘長數寸大如箸

銀魚 產泖湖者最細而味美若近城所產長盈三寸者俗呼爲麪條魚

黃頰魚 俗名魮魮亦作剛頰其頰骨硬故也首尾俱小亦無鱗似鮎而色黃身有黑斑食此

魚忌食荊芥

鯿魚 卽刀鱗色白多刺產海中者尤佳

比目魚 出黃浦形如筭一名筭魚亦名板靴郭氏曰兩片相合乃可行今見其如浮箬而行殊不相比也味最佳

鰻鱺魚 或曰有雄無雌以影漫于鱧魚則其子皆附于鱧鬚而生故謂之鰻鱺

黃鱔魚 黃質黑章體多涎沫夏出冬蟄水族中最益人

推沙魚 一名吹沙魚無細骨冬月腴軟極珍
至春則尾腐以敗一種短而紅腮者食蝦冬曉
悉浮水面吸霜味甚鮮名蝦虎俗呼紫腮鱸惟
郊西橫潦涇洙涇有之

鮎魚 釋名鯢魚口腹俱大有齒有胃有鬚鉅
細之魚供其口腹

鯁魚

鱒魚 目赤呼為赤眼鱒土人匿水草間釣之
得一頭則其羣徘徊尋覓釣取至盡

斑魚 似河豚而小色淡黃有黑斑味甚腴

箭頭魚 形甚似長二寸許俗呼玉筋

螃蟹 出三泖者大謂之泖蟹出上橫涇者小
謂之金錢蟹今惟出青浦潘蕩者大而美揚雄
方言稱為郭索其螯最銳雄多白膏雌多黃膏
性多躁引聲噀沫至死乃已

彭蠡 似蟹而小似彭蚶而大鄉人取其螯號
鶯哥嘴世說蔡謨過江食之委頓吐下方知非
蟹今鄉俗賤之

蜆 以四保歸涇產者為上

鱠魚 形秀而扁微似魴而長白色肉中多細刺如毛出海中鄉俗以夏至後半月為三時魚盛于四月取迎時之義銀鱗不粲厥味鍾焉存而烹之肥甘莫匹魚中神品

鱠鯉魚 一名王鮪長者有丈餘至春始出而浮陽見日而目眩其狀如鱸而無甲其色青碧其冠鬆脆可愛

石首 俗呼黃魚每夏初賈人駕巨舟羣百人

呼噪出洋先於蘇州冰廠市冰以待謂之冰鮮

鹽曬為鱠曰白鮓金山青村為盛吳地記吳王

入海阻風絕糧禱而得此食之美既歸想之制

字從美從魚曰鮓或從養省誤一云每歲四月

自海洋至其聲如雷海濱人入竹筒探水底聞

其聲乃下網取之潑以淡水皆圍圍無力扁身

弱骨細鱗黃色如金首有白石二枚堅如玉

鱠 其出與石首同時魚腹有硬刺勒人故名

可作鮓

鯧 身廣而頭銳細鱗而脆骨游于水羣魚隨之食其涎沫有類于娼故名作炙食至美

梅魚 似石首不盈五寸別一種名黃婪

河豚 海及江浦俱有之有毒能殺人一名吹

肚魚甘腴不可言無頰無鱗與口目能開合及

作聲凡洗宜極淨煮宜過熟治之不中度不熟

則毒中其毒者水調炒槐花末及龍腦水至寶

丹或甘草水或甘蔗汁皆可解橄欖亦解故羹

中多用之食後服荆芥附子者立死土人每以

三頭為一部諺云得一部典一袴春初競以餉

客其腹腴為西施乳蘆芽長尺許便不可食楊

樞松故述云樂宗茂仁和人來同知府事弘治

戊申署上海縣食河豚而死又崇禎庚午春戶

部丁自勸以監兌至郡會公讌食河豚而美庖

宰繼進誤中其毒未終席已不救諺云蘆青長

一尺莫與河豚做主客則其時毒尤甚也

蝻 生海邊泥穴中大者青蟬小者黃甲螯

足無毛兩小足薄而闊者曰撥棹子七夕前價

甚貴

白蟹 似蟾蚌而殼稍薄

青蝦 大如掌俗稱對蝦三四月間有之

水母 卽海蜇

沙鉤 生海墘沙中聞人聲卽走釣取乃得故

名沙鉤漬以甘醲殼軟而味腴爲珍品爾雅翼

云沙狗蘆虎皆蟹之屬故又名沙狗

彭蚶 蚶作蝟又作蠃小蟹世傳漢醢彭越賜

諸侯英布不忍視之覆江中化此緣以爲名或

曰蚌螺所化膏可塗癬足無毛者堪食海上人以鹽藏之鬻于市樂天詩鄉味珍彭越卽此

白蜆 淡菜 牡礪

蟹 蜆 蛤蜊

海螺 土人以香料熟而賣之今且登几案

金魚 上海好事者畜之以爲磁缸之玩尚短

嘴岐尾又有十二紅十四紅落花一捧雪朱眼

其種類迥異亦得以附魚末云

蟲屬

蠶 鄉俗不事繭絲間有飼蠶者亦不大熟止一二筐以供絨花之用

蜜蜂 鄉人畜之名土蜜冬割取蜜房

穉蜂 卽胡蜂螫最利

胡蝶 有黃白花三種花者斑斕可愛相傳山

伯英臺所化

蟬 有二種吟風咽露品固高矣如聲聒聒何

螢 腐草所化一名丹良

蜻蜓 淮南子稱水蠆

螳螂 子著桑上名桑螵蛸

絡緯 一曰莎雞俗呼紡織娘

蟋蟀 好鬪勝輒矜鳴多有畜之以角戲者

蟋蟀 月令螻蛄鳴卽此

蝠 鼠所化能食蚊糞名夜明沙

蚊 名白鳥惟府學普照寺金沙灘無之

蠅 夏出冬蟄善炎惡涼古人憎之

蝦蟆 喜居濕處背有黑點身小能跳接百蟲

解作呷呷聲

蚓 土之精無心之蟲

蟻 一名元駒穴居卵生

布帛屬

木棉布 古名吉貝續志云出沙岡車墩間幅

闊三尺餘緊細若紬其後織者狹幅促度復殊

於前今所在有之雙廟橋有丁氏者彈木棉極

純熟花皆飛起織布尤為精輒號丁娘子布又

一種用紫木棉織成色赭而淡名紫花布

番布 出烏泥涇元元貞間有黃道婆者自厓

州來始教製捍彈紡織之具至錯紗配色綜線

挈花各有其法織成被褥帶悅其上折枝團鳳

碁局字樣粲然若寫販鬻旁郡鎮人賴之其後

三紗布滋為象眼綾紋雲朵膝襴曾背等樣蓋

出於此明成化間鄉人有以餉貴近者流聞禁

庭下府司織造赭黃大紅真紫等色龍鳳斗牛

麒麟等紋一疋有費至百金者弘治在東宮深

知其弊即位首罷之嘗閱內帑見之曰此布一

疋文綺十疋價也終身不一御自是遂絕又成

化間湘陰宋端知華亭縣以雲布一端獻其師
華容黎侍郎淳淳題其外封曰昔之縣令種桑
拔茶今之縣令錦上添花却還不受

兼絲布 以白苧或黃草兼絲爲之今不復見
又有絲作經而緯用棉紗曰絲布即俗所稱雲
布也近有兼絲木棉製爲絨布其顏色花紋各
異

藥班布 俗呼澆花布今所在皆有之

織衲 續志云出下沙其紋如衲近郡中復有

之名衲布

綾 一名紵絲綾自唐有之天寶中吳郡貢方

紋綾大曆六年禁吳綾爲龍鳳麒麟天馬辟邪

之紋者夏竦對策宦者以吳綾手巾乞題詩時

貴重如此續志云出泖灣服舊可浣今府城東

門尤盛制作之精吳門不及其上供者幅廣而

長曰官綾有素地者爲光綾楊鐵崖所謂研光

綾也一種縝密而輕如縠曰糊窻綾又有藥綾

因當道求索者衆紕薄其質傳藥以緊厚也

只孫 元時貴臣侍宴之服今衛士擎執者服之紵絲地團花有青綠紅三色

紗 顧志云以上三種今不常見

紫白錦 續志云多爲坐褥寢衣雅素異于蜀今間有織者

畫絹 張氏倣宋式造

服用屬

翦絨花毯 以棉線爲經采色毛線結緯而翦之花樣異巧應手而出至今有之

蒲花胖褥 華亭陂蕩多蒲故市人製以貿易或變爲蘆今亦間有

蒲鞋 顧志云出東門三里汀有極細巧者又有作長鞦如靴者甚惜足野老多以禦冬

銀器 元時制作極精有唐俊卿與嘉興朱碧山平江謝君餘並稱

銅器 明萬曆年間華亭胡文明有鎏金鼎爐瓶盒等物上海有黃嬾軒古色爐瓶制皆精雅今效之者遠不及

細木器 陳志云貨器之類隨時變易或昔有今無或他郡並產不皆出於松也

椶笠

牛尾帽

漆紗巾

撥羅絨文繡

梅花燈籠

墨 以上六種今皆無

談箋 有數種惟玉版玉蘭鏡面宮箋爲最眉

公題云吾鄉談仲和箋擣染有祕法蓋其祖侍郎彝庵公倫得之內府者也妍妙精潔在古密香冰翼之上董元宰謂其潤而綿下筆瑩而不滑能如人意之所致今多贗造者

顧繡 上海顧氏露香園製凡衣裙畫幅俱劈絲爲山水花鳥儼然生動

木屐 較他處堅緻華美

食物屬

鹽 出下沙青村袁部等場色白如雪所謂吳

鹽也陳志云鹽取精于日成形於火霽雨沙淡久陰沙溼不能成鹽其產鹽之地自寶山至九團謂之窮海水不成鹽鱗甲亦鮮自川沙至一團水鹹可煮亦有海錯惟南匯沙嘴及四團尤饒按濱海鹽場每場畝許用削刀平沙如灰鋪勻擔水澆曬後用板推夾成一長埂以防夜雨明晨翻開仍曬如前漸成鹽花盛夏二日秋冬四日曬力方足嚴冬西北風殊勝日曬也倘將成而值久雨則復無用矣先此築土圈如壘名

曰橐旁鑿一井以竹筒潛通之俟沙力既足乃取短木鋪橐底冒以稻草與灰然後聚場沙置橐上再覆以稻草與灰挑水潑之使水由竹筒滲入井中是曰滴鹵驗鹵之法以石蓮肉投入浮者爲真其雜以水者味薄不堪煮石蓮亦沈矣煎法一竈四鑊首鑊近火末鑊近突以次遞熱運至大鑊取惜薪也煎週日而始成鹽煎時鑊上撈起者曰撈鹽白而乾潔鹽之上者每鹵二大鑊俗呼一盪得鹽可二百觔鹽之盈縮繫

乎雨暘貴賤視乎薪價近者內蕩既皆成田而海薪復絕况商紀頓貧各竈鹽壅爲力勞而獲又寡煮海之民始瘁矣另有甃磚作場以沙鋪之澆以滴鹵曬于烈日中一日可以成鹽瑩如水晶謂之曬鹽價倍于常惟盛夏有之不能多得

酒 顧志云雪香酒味香冽而色白松酒之最佳者俗以九月初造新酒名開清其品短水爲上九峯酒次之清酒又次之夏日則用白酒其

佳者曰靠壁清上海有清酒曰燒清冬月造至夏始開泖濱近有劉氏者汲泖水做三白法釀酒味亦甘冽俗號劉酒

蠟黃 以菜豆退沙入糖蜜香料糝爲膏片而鬻時爲珍庖

脆梅甘豆 以青梅製脆鏤虛其中黑豆巨者糜鶻之用糖淪豆汁充炎月美供梅已渴黑豆性涼消暑云

梅皮 出青浦削青梅皮以蜜餞製之味甘脆

用以餽遺

銀絲豆生 以豆糝麪為之細如絲髮舊出小蒸

茶食 有蓼花地黃盒一捻酥等名

線板糖 形如線板

石榴糖 中虛外圓一名毬子二種並出洙涇

雪糕 因其輕白故名

琥珀光 以燒酒為之用薄荷蘇木白糖加入色味俱佳

糟蔬 亦顧氏露香園遺法名蔬俱備

Blank columns for text within a rectangular frame.



